

Uunga siunnersuut: Nunami sumiiffinni immikkut toqqakkani takornariartitsinermik inuussutissarsiornissamut akuersissuteqartarneq pillugu inatsisartut inatsisaata nr. 19, 3. december 2012-imeersup allanngortinneqarnissaa pillugu Inatsisartut inatsisaat nr. xx, xx. Xxxx-imeersoq

(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Ilisimatitsissut

(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Siullermeerneqarnera

Nunami sumiiffinni immikkut toqqakkani takornariartitsinermik inuussutissarsiornissamut akuersissuteqartarneq pillugu Inatsisartut inatsisaata allanngortinneqarnissaa pillugu matumuuna saqqummiutissavara. Siunnersuut Aalisarnermut, Piniarnermut Nunalerinermullu Naalakkersuisoqarfimmit taparserneqarluni saqqummiunneqarpoq.

Takornariartitsinermi akuersissuteqartarneq pillugu inatsisip siunertaraa Kalaallit Nunaanni takornariartitsinermik ineriartortitsinermut ilapittuutaanissaa, kalaallillu takornarianut tunisassiaasa tunisaanerisa siuarsarnerisigut inuiaqatigiinni siuariartornermik pilersitsissalluni.

Takornariartitsinermi akuersissutit pillugit inatsimmi eqalunniarluni sunngiffinni aalisarneq maannamut ilaatinneqarsimangilaq. Takornariartitsinermik inuussutissarsiornermi akuersissutit naleqqussarneranni marlunnik inatsiseqassalluni siunertaqanngilaq. Qaavatigut allaffissornermik pilersitsisuuvoq, taamaalillunilu sulianik suliarinnittarnermi piffissaq sivilunerusoq najoqqutassallu qinnuteqartut iserfiginiagassaat amerlanerusut. Takornariartitsinermik inuussutissarsiornermi siuariartornissamut tamanna siursaataanngilaq.

Sunngiffimmi aalisarnissamut akuersissuteqartarneq pillugu inatsisartut inatsisaata atorunnaarsinneqarnerani, taamaalillunilu inatsisit ataatsimoortinnerisigut makkunatigut suleriaatsit assigiissaartunngussapput; neqerooruteqartarnermi suleriaaseq, qinnuteqaatinik nalilersuisarneq akuersissutinillu tunniussisarneq kiisalu ataatsimut isigalugu sulianik suliarinnittarnerup allaffissorneraatalu paasiuminarnerulernissaat. Tamakku inuussutissarsiornermut allaffissornermullu iluaqutaassapput.

Akuersissuteqartarnermut inatsisit ataatsimoortilernerisa saniatigut siunnersuummi ilanngunneqarpoq Naalakkersuisut sammisakkaartumik pilersaarutit aqqutigalugit sumiiffiit immikkut toqqakkat takornariartitsinermi akuersissuteqarfissatut toqqaasinnaanannut

periarfissinneqarput. Isumaq tassaavoq takornariartitsinermi akuerissuteqartarneq pillugu inatsisip siunertaa anguneqassammat, taamaaliornikkullu nunatsinni takornariartitsinermik inuussutissarsiornerup ineriartortinnissaanut ilapittuutaassammat inuiqatigiinnilu siuariartornermik pilersitsineqassalluni. Taama allanngoriartorneq suliffinnik pilersitseqataassaaq kiisalu takornariartitsinermik inuussutissarsiornermi inuussutissarsiutinullu kalluarneqartunut siuarsaasussaalluni. Taamaammat ineriartornerup Kalaallit Nunaanni tamarmi pinissaa pingaaruteqarluinnarpoq.

Neriuutigaarput periarfissatigut atugassarititaasunut pitsanngorsaatit tamakku Kalaallit Nunaanni takornariartitsinermik inuussutissarsiornerup ineriartortinnerani aningaasaliissutit amerlinissaannik kinguneqassasoq, taamaalillunilu siuariartornermik malitseqassalluni.

Taama oqaaseqarlunga oqallilluarnissaq kissaatigaara.